

Q. D. B. V.

DE
INJVSTA QVERELA
QVOD
TEMPVS MALVM SIT
DISSERTATIO PHILOSOPHICA

QVAM
PHILOSOPHORVM LIPSIENSIVM
INCLYTO ORDINE.



BENEVOLE ADPROBANTE
EX EIVSDEM CATHEDRA
PVBLICO ERVDITORVM EXAMINI
DEBITA SVBMITTENT OBSERVANTIA

P R A E S E S
M. IOAN. HENRICVS BEHR

BEROLINENSIS
S. S. THEOLOGIAE CVLTOR

ET
R E S P O N D E N S
DAVID FRIDERICVS TEVBNER
HAYNA MISNENSIS
PHILOS. BACCALAVR.

D. XXI. JVNII A. R. S. cl^o lccc XXVII.

L I P S I A E
LITTERIS IMMANVELIS TITII. Digitized by Google

THE

THE

THE

THE

THE

THE

THE

THE

THE

THE

THE

THE

THE

THE

THE

THE

REVERENDISSIMI
SENATVS ECCLESIASTICI
PER

TERRAS BRANDENBVRGICAS
S V P R E M I
PER-ILLVSTRI ET EXCELLENTISSIMO

P R A E S I D I
DOMINO SVO GRATIOSISSIMO
ATQVE

C O N S I L I A R I I S
MAGNIFICIS SVMME REVERENDIS
CONSVLTISSIMIS GRAVISSIMIS

V I R I S
DE ECCLESIA ET REPVBICA
IMMORTALITER MERITIS
MAECENATIBVS

A C
PROMOTORIBVS SVIS
SVMMA QVA DECET VENERATIONE
ANIMI DEMISSIONE AC PIETATIS
OBSEQVIO AETATEM COLENDIS

HANC
DISSERTATIONEM ACADEMICAM
IN
OBSERVANTIAE PERPETVAE
MEMORIAM
CVM LONGAEVAE VITAE
ET PERENNIS PROSPERITATIS
VOTO ARDENTI
OFFERT DICAT CONSECRAT
SIMVL
GRATIAE VLTERIORI
PATROCINIO AC FAVORI
SE SVAQVE STVDIA
DE MELIORI COMMENDAT

IOAN. HENRICVS BEHR.



ΣΥΝΟΨΙΣ.

Præfamen. §. I.
Tempus absolutum & relativum.
 §. II.
Quantitas & qualitas ejus diversa.
 §. III.
Improprie temporis acceptiones.
 §. IV.
Partes temporis. §. V.
Definitio temporis. §. VI.
Malum vel metaphysicum, vel morale,
vel physicum. §. VII.
Est adjunctum. §. VIII.
Est privatio. §. IX.
Tempus malum quid? §. X.
Injusta querela quid? §. XI.
Tempus non malum est, quia mala
tempori non inherent. §. XII. XIII.
 XIV.
Quia a tempore se cogi putantes li-
bere agunt. §. XV. XVI. XVII.
Quia mala videntur quæ non sunt.
 §. XVIII. XIX. XX.
Quia, quod a Deo constitutam, bo-
num est. §. XXI.
Obiectio I. de firmamento inclinante.

§. XXII. XXIII. XXIV. XXV.
 XXVI. XXVII. XXVIII. XXIX.
Obj. II. de ætatis nostræ parvo spa-
tio. §. XXX. XXXI. XXXII.
Obj. III. de corporum humanorum de-
fectibus aliis. §. XXXIII. XXXIV.
 XXXV.
Obj. IV. de corruptione in rebus sa-
cris. §. XXXVI. XXXVII. XXXVIII.
 XXXIX.
Obj. V. de corruptione rerum publi-
carum. §. XL. XLI.
Obj. VI. de defectibus Medicorum.
 §. XLII.
Obj. VII. de defectibus Philosophorum.
 §. XLIII.
Obj. VIII. de defectibus in Mathesi.
 §. XLIV.
Obj. IX. de deficiente Magia. §. XLV.
Obj. X. de artibus perditis. §. XLVI.
Obj. XI. de infelicitate litteratorum.
 §. XLVII.
Obj. XII. de auri seculi absentia.
 §. XLVIII. XLIX.
Conclusio. §. L.



§. I.



On levis injuria temporibus rebusque nostris inferitur a multis, qui, quoties dari aliquid & adversi patiuntur, perverse statim temporibus id tribuunt perversis. Sed illi cum existimant sua tempora præteritis & antiquioribus esse pejora, vel eorum quæ ante nos extiterunt & facta sunt, plane sunt expertes, vel illa tamen, indignatione capti, non satis perpendunt, nec debite ea conferunt cum præsentibus. Hoc enim si facerent, res cum rebus, eventus comparaturi cum eventibus essent, nec tempori, quod aliis omnino causis debetur, tribuunt. Licet enim certissimum sit, eorum omnium quæ in tempore sunt nil, excepta eorum inconstantia, constans esse, nihilque rerum mundanarum mutatione, aliquo minimum carere respectu; propius tamen res insipientibus apparet, æqualem semper temporum ipsorum persistere faciem. Hæc nunquam non bona est, si quæ aliqua immutentur, hominibus ea potius in tempore viventibus, aut aliis rebus adscribenda sunt, quam ipsi tempori. *

* Cum essentia rerum immutabiles sint, & ratione accidentium solummodo res mutantur; tempus semper idem est.

§. II.

Dupliciter autem tempus spectatur, vel prout fluxu semper æquabili progreditur, & accelerari nequit ac retardari, quod verum dicimus & absolutum tempus; vel prout sensibilis & externa quævis durationis cujusvis mensura est, quod relativum tempus appellamus. Hæc sensibilis durationis mensura, siue exacta est ut annus, mensis, reliqua, ad Solis, Lunæ reliquorumque astrorum motum uniformem exacta; seu non adeo æquabilis, quæ horologia tantum sequitur vulgaria. *

* Cl. PETRVS van MVSCHENBROEK in *Epitome Elementorum Physico-Mathematicorum cap. VI.* differentiam temporis veri & absoluti a relativo cum indicasset: *Comparatio autem, inquit, inter motum & tempus manca est, & addit rationem §. 98. Quia nescimus an motus absolute æqua-*

æquabilis in corpore detur, tempus relativum incertum est, & a vero differt.
 Confer JO. BAPTISTAE du HAMEL *Astronomiam Physicam* l. II. cap. 3.
 pag. 110. & cap. 4. pag. 122.

§. III.

Cum longum & breve temporis vocatur spatium, quantitatis habita ratione, quantitas hæc durationis prædicatum est rei quæ durat, non temporis ipsius, ut rei peculiaris, quæque rem durantem dirigat. Similiter si ratione qualitatis bonum aut malum, felix aut infelix nominatur tempus, non tempori ipsi, verum rebus, quæ sunt in tempore, hæc sunt tribuenda. Accidentia igitur temporis, quantitas non minus ac qualitas, prout tempus aut absolute consideratur aut relative diversimode etiam spectari debent. Absolute enim si sumitur, neutrius horum duorum accidentium habetur ratio; relative autem si tempus æstimas, accidentia quidem hæc temporis vocantur, non tamen proprie etiam temporis, sed rerum potius sunt, quæ sunt in tempore.*

* Confer Celeb. WYERII GVILIELMI MVYS *Elementa Physices Methodo Mathematica demonstrata*. Prop. XIV. pag. 834. seq.

§. IV.

Improprie cum tempori competant quæ illi tribuuntur, & tempus tamen ipsum, pro diversis attributis diversum putetur, impropria temporis acceptio bene notanda est, hæcque tam ratione quantitatis, quam ratione qualitatis. Ratione quantitatis improprie sumitur, cum spatium temporis tempori ipsi adscribitur, quasi ipsum cogeret res quæ sunt in isto spatio, ut nec citius nec serius spatium illud absolvere possint, sicque necessitas quædam & factum a tempore dependeat.* Ratione qualitatis sumitur improprie vocabulum temporis, quando pro rebus naturalibus: Sole, Luna, Astris sumitur, quæ tempora, secundum diversam ratione nostri positionem, mutare videntur; ** aut quando in specie accipitur pro actionibus hominum hincque sequentibus eventibus, hominemque præprimis concernentibus rebus, cum physicis tum moralibus ***

* Exemplo hic sit vitæ humanæ spatium.

** Ut quando temporis innovatio vocatur, si Sol vel Luna ad idem de-
 nuo circuli quem describit punctum accedit. c. g. vere, novilunio.

*** Sic

*** Sic durum vocatur tempus, quando alter ab altero dura atque adversa patitur. Ad tempus relativum autem hæc omnia spectant.

§. V.

In partes extra partes tempus dividitur, non relativum solum seu improprium, verum & absolutum. Hæ partes non minus infinitæ fieri possunt, quam partes lineæ mathematicæ, quæ cum magnitudo simplex & uniformis sit, per puncti fluxum optime exprimitur. Tempus enim similiter intellectui commodissime representatur, per momenti vel instantis in longum exprorectam successionem, vel longinquitudinem. Cum tempus a rebus mensuretur, varia quidem ipsius partibus imponuntur nomina, quorum alia determinata sunt: annus, mensis, dies, hora, similia; indeterminata alia: præteritum, præsens, futurum; sed hæc etiam non temporis, verum nostram rerumque nostrarum indicant mutationem. Temporis igitur absoluti nunquam fere, relativi autem semper habetur ratio. *

* Doctissimus Cantabrigiæ Mathematicus ISAACVS BARROW lectionum Geometricarum, quæ una cum Opticis ipsius lectionibus prodierunt Londini 1674, prima: Tempus, inquit, non actualem existentiam; at capacitatem tantum seu possibilitatem denotat permanentis existentie.

§. VI.

Tempus igitur, prout apud nos in censum venit, nihil est aliud, quam intervallum durationibus emensum & apparentis rerum mundanarum, corporum præcipue cælestium. Intervallum cum sit vel mensura & spatium durationum, omnia quidem in illo sunt, ab eo autem nihil fieri potest; non causa enim, sed effectus, non agens est, sed patiens. Duratio etiam nec quicquam agit; sed sit illa pro qualitatibus & circumstantiis rerum, quæ apparent quam diu durant, apparere autem & durare si desinunt, intervallum simul, quod inde a sua origine describebant, finiunt ipsique ponunt terminum, nullo modo terminum ab illo sibi fixum agnoscunt. Corpora enim mundana, cælestia præcipue, motu suo intervalla quædam durationum & apparentiarum desinunt, unde Solis emenso cursu annus, Lunæ absoluto circulo circumscribitur mensis; non vero annus impellit Solem, nec mensis Lu-

nam cogit, ut cursum vel citius absolvat, vel protrahat longius. *

* AVGVSTINVS libro XIV. Confes. Quid ergo est tempus? inquit, & respondet: si nemo ex me querat, scio, si querenti explicare velim, nescio. Et profecto si veterum recentiorumque viro- rum doctissimo- rum de tempore effata inspiciamus, pauca esse quæ de tempore sciri pos- sint apparet. Communiter tempus habetur pro mensura motus, ut ARI- STOTELES docet, quæ Phys. IV, 16. ὅταν, inquit, ἡ κίνησις, τοσούτος χρό- ὁ χρόνος αὐτῇ δοῦναι ὑποτίθεται, quantus motus fuit, tantum tempus videtur exti- tisse. Tempus hic non pro causa motus agnosci posse apparet. CICE- RO de Invent. Tempus est, inquit, id quo nunc utimur [Nam ipsum quidem generaliter definire difficile est,] pars quadam æternitatis, cum alicujus annui, mensuri, diu ni nocturni spatii certa significatione. Pars quædam æternitatis, ab alio quod in ea est describi debet, sicque patiens quidem, non autem agens quid est; & significatio alicujus spatii nihil quoque præstat quod pro causa eorum quæ in illo sunt haberi possit. ISAACVS BARROW, l. c. Tempus inquit, est perseverantia rei cujusque in suo esse, statu motive. Perseverantiam rei, quæcunque sit, causam agnoscere tem- pus, dici nequit; rei enim cujusque natura perseverantiam hanc efficit, ut ipse auctor indicat. ISAACVS NEWTON, Phil. Nat. Princ. Math. p. 7. Tempora, inquit, & spatia sunt sui ipsorum & rerum omnium quasi loca. In tempore quoad ordinem successionis, in loco quoad ordinem situs locan- tur universa. Cum nec locus aliquid per se efficiat, multo minus quasi locus, rerumque locatio. Celeber. CHRISTIANVS WOLFIVS in Ele- mentis Chronologia: Tempus, inquit, est successio phenomenorum in uni- verso, & ejus, quam habemus, idea in ordine perceptionum successivarum consistit. Successio non phenomenorum, ut phenomena non successionis, scilicet absolute spectatz, causa est; sed in universo successio quidem phæ- nomenorum datur, non autem quicquam in universo bonum aut malum fit ab hac successione. Ordo perceptionum fit secundum successionem hanc, hinc verò tempus nec perceptionum, nec eorum quæ percipiun- tur causa fit. Doctif. MICH. GOTTLIEB HANSCHIVS Theorema- rum Metaphysicarum ex Philosophia Leibnitiana selectarum definitione XXV. Tempus est, inquit, connexio plurium incompatibilium, sive mutuo sibi succedentium, secundum communem aliquam normam. Nec conne- xio hic, nec norma secundum quam illa fit, aliquid facere dicitur; conne- xio effectum, norma non agens sed patiens indicat; res autem sibi mutuo succedentes & actum & causam actus in se continent. Conferantur MV- SCHENBROCKIVS & MVYSIVS locis citatis, ut & JO. CHRISTOPHO- RVS STVRMIVS Matheseos Juvenilis Chronol. Sect. I. Ne igitur indi- gnetur

gnetur quisquam, quod, cum de tempore tam parum constet, definitio-
nem solummodo nominalem temporis suppeditein.

§. VII.

Malum sub se comprehendit tum imperfectiones rerum sim-
plices, tum actiones & omissiones intelligentium a norma sua di-
scedentium, tum etiam perpeffiones creaturarum sensu prædita-
rum. Primum, quod finitudini rerum cohæret, malum vocatur
metaphysicum; sequens labilitatem, quæ a finitudine dependet,
causamagnoscit, & appellatur, morale; ultimum nominamus phy-
sicum, & ab imperfectione eisdem, ut reliqua, originem ducit.
Triplex igitur ratione objecti malum esset patet. *

* Vide Illustris GODOFR. GVILIELMI LEIBNITH *Theodici-
am Parte III, §. 241.*

§. VIII.

Ratione subjecti in quo malum notatur, observanda quoque
venit mali differentia. Vel enim subjectum ipsum malum vide-
tur, vel tantummodo adjunctum ipsius malum est. Si subjectum
ipsum malum est, ratione essentia suæ malum sit necesse est; tale
autem quaquaversus spectes nullibi invenies. In utroque casu aut
corruptio illa inseparabilis est & irremediabilis, aut separari a sub-
jecto illudque corrigi potest. *

* Conferatur *Theodicea Parte II, §. 213. & 214.*

§. IX.

Ex hisce liquet, quomodocunque malum inspicias, privatio-
nem illud esse, non rem, aut statum quandam rei absolutum &
originarium. Circumspicientibus pluriina quæ se offerunt nobis,
mali ut privativi entis exempla præbent, quatenus scilicet aut per
se imbecillia sunt, comparata scilicet cum robustioribus magisque
durabilibus, aut in eo statu non persistunt, in quo perfectionem ori-
ginariam conservent. Quæ per se imbecillia sunt, vel accuratius
loquendo talia tantum videntur, bona etiam præstant, quamvis &
mala quædam inferre videantur. Corrupta quæ sunt, si in se invi-
cem agunt, mala quidem producant, quæ tamen non omnem quo-
que bonitatem excludunt. * Hinc entia omnia quatenus bona en-
tia

tia nempe absoluta, auctorem agnoscunt creatorem; quatenus vero mala sunt, privationes scilicet boni patientes, dependent a creaturis. **

* Cum in mundo perfectio, qui perfectissimum creatorem deceat, nihil esse possit quod non ad universi perfectionem suam tribuat; venena, zizania, feræ bestiae, alia quæ multa nocent, se sistunt. De hominis præcipue corruptione testis e veteribus Philosophis PLATO est, qui: *Cecidit autem, inquit, animus noster in corpus, cum prætermisso divino, solo suo usus est lumine, ac se ipso capere esse consentus.* Vide MARSILII FICINI *comment. super Platonis conviv. Orat. IV. cap. 4. fine.* Quid de hoc malo Pythagoras senserit, cum illud *ευνεταδο*, vocet, de hoc vide FRID. RAPPOLDI *comment. in Horat. pag. 1151.* Quod vero mala quædam in mundo perfectissimo locum habere possint, de eo consule *Leibnizii Theodiceam Parte I. §. 9. seq.*

** Mala omnia a creaturis ducere originem, nulla autem mala Deum auctorem agnoscere docet LEIBNITIVS *libri citati Parte II, §. 149.* Celeb. WOLFIUS *Metaph. §. 1056.* & CL. GEORG. BERNHARDVS BVLF-FINGERVS *Commentatione Philosophica de origine & permissione mali, præcipue moralis.*

§. X.

Cum quod quid ipsum non habet, in aliud conferre non possit, tempus quod causa non est nec actio, malo essentiam vel existentiam tribuere non potest. Malum etiam cum privatio tantum sit, tempori neque essentiam neque existentiam potest tribuere. Hinc etiam tempus malum ens positivum, statui non potest, atque si hoc, nihil etiam a tempore malo fieri potest; requiritur prius in quocunque malo subjectum reale, cuius adjunctum sit malum. Tempus malum proinde nihil est aliud, quam intervallum durationis, quod subjectorum pravorum pravæ actiones emetiuntur; merus igitur effectus, mera passio est. *

* Si nempe tempus relativum intelligimus. Consentit nobiscum HIERONYMVS qui: *Ne dicas, inquit, priora tempora meliora fuisse, quam aunc sunt: virtutes faciunt dies bonos, vitia malos, in Eccles. lib. XIV.*

§. XI.

Querela cum sit explicatio displicentiæ ob malum obveniens; injusta querela est explicatio tædii ob malum quod immerito obvenire falso creditur. Cum igitur tempus malum vocatur, inju-

nam hanc querelam esse monstraturo opus esse video, ut probet ulterius, immerito atque injuste temporis mala adscribi. Hoc agens ita procedam, ut argumentis primo sententiam meam stabiliam, deinde autem graviores quasdam ac potiores instantias contra illam asseram, easque refutem.

§. XII.

Injuste autem tempus ut malum accusari, primo exinde probò, quia causa eorum putatur eventuum, qui vel ipsis iis qui malis vexantur adscribendi sunt, vel aliis tamen hominibus aut rebus. * Cum si ipsi malorum suorum causæ sunt, hoc vel per se fiat vel per accidens, per se variis modis malorum quæ sufferunt causæ sunt. Aut enim actionibus antecedentibus ea, quæ deinde sequuntur, tribuere debent, aut præsentibus actionibus suis, futura sibi accersunt mala, aut præsentia plane, eaque aut physica aut moralia. Bene igitur ac diligenter rependere eventus, aut certo aut probabiliter futuros, cum quilibet debeat qui acturus est; nihil mali faciendum est, nihil etiam de quo dubia hæret sententia utrum bonum sit an malum. **

* Generalissima hic tantum trado. Ingredi quidem ethicæ campos possem, & indicare quænam actiones bona accerferent quæ mala, reliquas etiam disciplinas morales, quæ officia nostra & prudentiam in agendo docent, ut & physiologiam, præprimis anthropologiam, quæ actionum hominis naturalium mechanico-physicas rationes suppeditant; sed instituti rationes hæc non permittunt. Adeat qui ea cognoscere cupit WOLFFII *Philosophiam Practicam universalem*, Celeb. ANDREAE RVDIGERI *Philosophiam Practicam de Prudentia*, Summe Venerandi JO. FRANCISCI BYDDEI *Elementa Philosophiæ Practicæ*, Gravissimi Viri GEORG. WOLFF-GANGII WEDELII *Physiologiam Reformatam* hujusque Affinis spectatissimi eruditissimi HERM. FRIDERICI TEICHMEIERI *Anthropologiam*. De loco Scripturæ S. *quæque nomina eor. Ephes. V. 16.* bene judicat AUGUSTINVS *Epist. LXXX. ad Hefych.*: *Quidam convenientius intellexisse mihi videtur, loquitur de loco Matth. XXIV, 22. mala ipsa significata nomine dierum, sicut dicti sunt dies mali in aliis divina Scripturæ locis. Neque enim dies ipsi mali sunt, sed ea quæ sunt in eis.*

** Vide Celeb. SAM. PFENDORFIVM *de Officio Hominis & Civis cap. I. §. 6.*

§. XIII.

Prouti in actionibus quæ necessario malum sibi attrahunt, cautione opus est; ita & in iis quæ per accidens. Sed cum accidentia mala, aut facilius aut minus facile evenire possint, hæc non æque facile prævideri possunt ac evitari quam illa. In utroque tamen casu nobis ipsis nostrisque actionibus mala ea adscribenda esse, patebit ei qui diligentius eventibus actionibusque suis attenderit. *

* Confer Celeb. JO. BALTHASARIS WERNERI *Elementa Juris Nat. & Gent. cap. I. §. 6.*

§. XIV.

Ab aliis, quæ patimur, aut nostris, aut illorum malis actionibus tribuere debemus. Si prius, redeunt hæc ad ea quæ jam dixi; sin posterius, aut per se aut per accidens aliorum actiones mala nobis inferent. Quodcunque autem ex hisce contingat, non tempori, sed hominibus imputanda sunt, quæ mala accidunt. Nam ut homo homini, ita & sibi met ipsi homo, sæpe omnino lupus est, & quilibet fortunæ suæ faber. *

* Unicum rem declarat exemplum. Titius laute vivit, simul vero unde deinde vivat non plane sine cura est. Sempronio creditori amico solvendum ipsi debitum, cum pecunia careat. Versuram igitur facit, non quidem difficilem, ipsi tamen injucundam & molestant. Hujus illius tædii an tempus culpa est? ipse, plura quam debebat consumens, eam constituit; alii quoque, qui ad lautius vivendum eum illicuerunt, summi tribuerunt; Sempronius denique citius quam speraverat proficisci coactus, hincque sua indigens pecunia.

§. XV.

Major adhuc injuria est, cum ad mala per temporis rationes se cogi existimant improvidi, qui libere tamen, quæ agunt, agunt. In illorum enim est potestate, ut has vel illas virtutes morales sibi acquirant, aut hæc vel illa vitia; hinc actionum quoque suarum reliquarum auctores ipsi sunt. Prouti enim animum naturaliter disposuerunt, hos vel illos habitus sibi acquirendo, varie etiam veritates inspicunt, & voluntatem determinant, ut deinde vel hæc vel aliæ actiones oriri debeant. *

* Quid justum sit, quid liceat, quid honestum, quid deceat, quid sit profi-

proficuum, ille omnino melius intelligit, actionesque suas dirigit prudenter, qui in id incumbit, ut genuinas horum ideas sibi acquirat, quam qui negligens ut inutiles subtilitates hæc spernit: sive bonum sit seu malum quod desiderat nihil pensitans, dummodo cupitis potiat. Confer PVFENDOR. FIVM, de O. H. & C. cap. 1, §. 13.

§. XVI.

Nec est igitur quod quis existimet, hoc vel illo animo hæc tum feci, quid resistere inclinationi possum naturali? temporis rationes eam excitarunt. Reputa rationem tibi non frustra datam esse; sed ad veritates indagandas, per quas deinde quid bonum, quid malum, quid appetendum, quid aversandum sit, indicatur. Si negligentior veritates scrutaris, hinc voluntas etiam ut bonum arripit quod bonum non est, malæque actiones hinc erumpunt, ipse tibi, quæ evitare potuisses, imputes. *

* Ad tria hominis bona principalia, tria quoque media communia & generalia esse, ratione corporis sanitatem, ratione intellectus veritatem, ratione voluntatis virtutem, docet Celeb. ANDR. RVDIGERVS, *Phil. Prag. I. III. §. 20. 21.* Qui unum medium bona obtinendi negligit, sapientis ac providi hominis nomen defendat fieri non potest, & quæ inde mala ipsi obveniunt, sibi ipsi illa imputet oportet. Confer. SENECAE *Epist. XXII.* & JO. SIMPLICII, *Comment. in Enchir. Epicteti, c. 34.*

§. XVII.

Alii si te cogere videntur ad male agendum, nec hoc temporis, sed tibi met ipsi imputes. Malorum enim consortium, ad minimum ut te ad mala non abripiat, evitare potes. Qui possis dubitas, cum pravorum hominum plena sint omnia? Si illi non permittunt ut eos corrigas, cur te ab iis corrigi & corrumpi permittes? Ex malis eorum bona collige, quod, si attenderis, fieri posse experieris. Nec etiam boni quibuscum agas, quique adesse tibi possint, deerunt. *

* Omnia sua concoquit Pamphilus, unde deinde vivat nihil curans. Solvendum ipsi Chremeti creditori debitum, cum pecunia careat. Versuram propterea facere cum velit, nec ii quibuscum sua dilapidavit, nec alius, mutuo ipsi dare vult nummos; hinc mæstus & anxius, unde sibi consulat non habet. Mæroris hujus quis auctor? An tempus Pamphilum cœgit, cum existimaret, omnia, quæ ad luxum eum invitabant, inevitabilia esse & incorrigibilia? occasionem epulandi, ludendi, sua largiter distrahendi non esse omittendam arbitrabatur, quia commestationes, & quævis luxuriandi genera,

genera, bona ipsi & appetenda videbantur? Certe hinc nulla tempus accusandi ratio deducetur. Pamphilum ipsum aduersæ suæ fortunæ auctorem esse patet. Confer. elegantissimum quod hic quadrat exemplum in *Theodicea Parte III*, §. 409. seq. Quod etiam ex malis bona derivari possint, de eo consule HIER. CARDANVM, de *utilitate ex aduersis capienda*. Immo cum grano salis accepta verba: *Souvent on tire plus de fruit de ses fautes que de ses belles actions*, nostram mire confirmant sententiam. Sunt illa FRANCISCI DE SALIGNAC DE LA MOTHE FENELONII in libro, cui titulum fecit: *Les Avantures de Telemaque L. XXII*.

§. XVIII.

Mala etiam multa, propter quæ tempus malum dicitur, si exactius consideramus, immerito pro malis habentur. Non enim per se; sed ratione objecti & applicationis, quædam res malæ sunt aut fiunt. Si vero quædam nobis mala sunt vel fiunt, hoc causam vel in nobis, vel in aliis aut personis aut rebus, nostra vero culpa, invenit. * Si enim diligentius veritates, ut jam monui, scrutati essemus, hincque simul habitum nobis acquisivissimus, non nisi vera bona appetendi, & non nisi vera mala averfandi; quæ jam nobis accidunt, & vera mala non fiunt, quod non sint, inspicituri essemus. Vera mala autem si sint, media statim se suppeditatura essent, ad ea aut evitanda, aut ad utilitates inde derivandas.

* Mala moralia causas ac fontes esse malorum physicorum videre est ex scriptis mores regendos docentibus; & mala physica interdum malorum moralium causas esse, constat ex scriptis physicis. Bene LEIBNITIVS: *une mauvaïse volonté*, inquit, *est dans son departement ce que le mauvais principe des Manichéens seroit dans l'univers; & la Raison qui est une image de la Divinité, fournit aux ames mauvaises de grânds moyens de causer beaucoup de mal. Un seul Caligula ou Néron en a fait plus qu'un tremblement de terre. Un mauvais homme se plaint à faire souffrir & à détruire, & il n'en trouve que trop d'occasion. Theodiceæ P. I. §. 26. De malis physicis vide eundem P. III, §. 251. ubi cum indicasset, in quo bona & mala physica consisterent, & bonorum physicorum amplissimum campum esse, ibi etiam ubi non apprehenditur, monstrasset: *Et sur ce pied là*, inquit, *j'oserai soutenir, que meme en cette vie les biens surpassent les maux, que nos commodités surpassent nos incommodités, &c.**

§. XIX.

Multa quoque mala esse videntur propterea quia bona, quæ

iis alias opposita fuisse videntur, non adsint. Attentius autem si agerent incanti, aut ea ipsa adesse, aut bona tamen alia, iis quæ ante non minora, intellecturi essent. Quod vero neutrum horum videant, & ita mala se pati putent, cui nisi sibi met ipsis imputabunt? Nec etiam hac de causa querelas contra temporis injurias jure instituerent possunt.

§. XX.

Si quædam re ipsa mala nobis sunt, cogitandum, quod vel multis aliis hominibus, vel toti etiam universo, per mala hæc bona multa evenire possint. Cogitandum, in universo non omnia ad unius hominis utilitatem jucunditatemque institui debere; sed ad perfectionem universi omnia suum debere tribuere. Hæc autem universi perfectio, optime consistit cum imperfectione quædam rerum particularium, quæ ipsæ ad perfectionem totius sua conferunt. Hoc tam in rebus physicis, * quam in moralibus locum habet. **

* Quemadmodum in machinis non omnes rotæ vel alie partes, ejusdem sunt roboris, sed imbecilliores non minus ac robustiores, ad perfectionem operis spectant; ita & in corporibus animalium, non membra solum robustiora, verum & imbecilliora, ad perfectionem totius corporis spectant. THOMAS AQUINVS *contra gent. L. III. cap. 71. ad prudentem*, inquit, *gubernatorem pertinet, negligens aliquem defectum in parte, ut faciat augmentum bonitatis in toto.*

** Si Cajus nunquam pecunia eguisset, multa bona non fecisset, quæ multis nunc utilitatem præbent; egisset mala multa, quæ multis, aut exemplo tantum, aut aliis modis plurimis, malum intulissent.

§. XXI.

Cum hæc vero, de qua jam loquimur, sapiens rerum institutio, sapientem universi & conditorem & gubernatorem indicet, nosque homines omnes ad ipsius pertineamus regnum; qui tempus malum existimat, sive proprie illud malum esse putet seu improprie, * rebellem contra universi Monarcham se præbet. In utroque enim casu, aut Summum numen malignum putabit, aut negligens tamen. Prius quasi ipsum primum mali & tempus depravans principium esset, posterius quasi mundana non curans, omnia

omnia sese depravare permitteret, nihili hæc habendo. Horum autem utrumque cum contra omnia præstantissimorum Philosophorum, gentilium etiam, militet principia; hinc quoque sequitur, nullo modo tempus malum dici posse. **

* Quod proprie dictum tempus malum non sit, ex jam dictis constat; tempus improprie dictum malum non esse, sequentia ulterius confirmabunt.

** CICERO de *Natura Deorum* l. II. pag. 61. editionis Hanovienſis de 1609. *Postea, inquit, cum vidissent, loquitur de Philosophis, motus ejus [mundi] finitor, & æquabiles, omniaque ratis ordinibus moderata, immutabilique constantia intelligere, inesse aliquem non solum habitatorem in hac cœlesti ac divina domo, sed etiam rectorem & moderatorem, & tanquam Architectum tanti operis, tantique muneris. Nunc autem mihi videntur ne suspicari quidem, quanta sit admirabilitas cœlestium rerum, atque terrestrium.* LEIBNITIVS Theodiceæ P. III. §. 247. *Dien, inquit, n'apas moins la qualité du meilleur Monarque, que celle du plus grand Architecte, & P. II. §. 240. de auctore Anglo libri de origine mali verba faciens: Il dit, inquit, que ce qu'une cause infiniment sage & libre a choisi est meilleur que ce qu'elle n'a point choisi. N'est ce pas reconnoître que la bonté est l'objet & la raison de son choix? dans ce sens on dira fort bien ici*

Sic placuit Superis; querere plura nefas.

§. XXII.

Accedimus nunc ad ea, quæ ad vindicandam querelam, quam hæcenus impugnaviimus, iustitiam afferri possunt. Primo autem loco se nobis sistit opinio, qua existimatur, mundos innumerabiles, in omni puncto temporis, alios nasci, alios interire. * Immo eventurum putant, ut ad extremum, omnis mundus corrumpatur, & Deus opus habeat de novo illum animandi, ut ita renovetur. ** Hanc veterum quorundam sententiam, nostris etiam temporibus Philosophus Mathematicusque insignis ISAACVS NEWTONVS cum ætæclis, præcipue Celeberrimo CLARCKIO, defendit. Putat enim successu temporis systema solare, quin & mundanum, fieri defectibus obnoxium, ita quidem, ut, nisi Deus illi vigorem pristini motus, per operationem immediatam, singularem & a cursu ordinario distinctam, diversis temporum intervallis redderet, successive motus in lentorem & quietem, ordo in confusionem desineret.

neret. *** Ex hac autem hypothesi sequitur deinde, tempora nostra antiquioribus illis non æque bona esse; sed corruptiora multo & infeliciora.

* CICERO de Nat. Deorum l. II. pag. 62. hanc aliorum sententiam refert.

** Idem Tullius quosdam existimare narrat, Panxtium de hac mundi imbecillitate addubitasse. *ibid.* pag. 69.

*** NEWTONVS, *Opticæ questione ultima* pag. 346. *Dum Cometa, inquit, moventur in orbibus valde eccentricis, undique in omnes cæli partes, utique nullo modo fieri potuit, ut cæco fato tribuendum sit, quod Planete in orbibus concentricis motu consimili ferantur eodem omnes; exceptis nimirum irregularitatibus quibusdam vix notatu dignis, quæ ex innu-meris Cometarum & Planetarum in se invicem actionibus oriri potuerint, quæque verisimile est fore ut longinquitate temporis majores usque evadant, donec hac natura compages manum emendatricem tandem sit desideratura.* CLARCKIVS in *Epistolis ad Leibnitium* passim hanc sententiam descendit.

§. XXIII.

Hancce, autem sententiam cui defendere animus est, observet, unum ex tribus sequentibus momentis pro fundamento ei adhibendum esse. Probandum nempe, non potuisse Deum ab initio providere perseverationi cursus naturæ per structuras corporum statumque aliquem, ut sic loquar, primum, in ceteros influentem, & per leges motuum constantes. Hoc si probare nequit, periculum ipsi faciendum est, an monstrare possit, Deo esse decentius, ut naturam ab initio languidam condant, & talem quæ subinde, post temporum aliquas periodos, in naturalibus etiam, requirat opem emendatricem. * Neutro modo si a priori sententiam defendere potest, relinquitur ipsi, ut indicet, per experientiam solícite institutam id constare, quod revera languescat opus naturæ, & restituatur deinceps pristino vigore extraordinarie, & sine causis naturalibus.

* LEIBNITIVS ad *Clarckium Epist. I. n. 4.* *Existimo, inquit, cum Deus facit miracula, non id fieri propter necessitates naturæ, sed gratiæ. Si quis aliter existimat, nimis ille tenuiter de sapientia & potentia Dei judicat.* Confer *Celeb. BVLFFINGERI Dilucidationes Philosophicas Sect. II. §. 224.*

§. XXIV.

A probatione per modum primum sapienter omnino abstinēt patroni sententiæ nostræ doginati oppositæ. Modo secundo sententiam suam ita stabilire aīlaborant, ut doceant, per eam quam optime probari, dari conservatorem rerum omnium; nostræ autem sententia Deum plane a mundo excludi. * Sed etiam si negemus immediatū in mundo condito & extraordinarium Summi Numinis, præter ea quæ in miraculis fiunt, ** concursum; quam firmissime tamen concursum Dei mediatum & ordinarium defendimus; ablit ut Deum a mundi conservatione excludamus. Per adversariorum autem sententiam, non conservatio, sed nova quasi creatio mundi docetur, quæ omnino sapientissimo potentissimoque Creatori indigna est. Nam cum per priorem creationem, quæ sola veri nominis creatio est, effectus & fines totales, & tum, & nunc, & in posterum produci queant, cur nova fiat creatio nulla est causa. Deus vero & natura nihil faciunt frustra.

* Vide *Epistolam CLARCKII ad Leibnitium l. num 4.*

• Hæc autem, nisi clarum de iis extet testimonium, fingenda non sunt.

§. XXV.

Per experientiam satagunt, ut corroborent hypothefin, cum dicunt, ex Astronomorum quorundam assertionibus constare, firmamentum jamdudum inclinasse, atque declinare illud ad interitum. Reputent vero illi, cum nec ipsius globi nostri, quem incolimus, mensuram accurate noscamus; plane arrogantis esse hominis, totius cœli remotissimorumque ipsius corporum magnitudinem, hincque distantiam eorum a nobis, accurate determinare velle. Per magnitudinem enim, quicquid exactius de distantia corporum cœlestium statuitur, probari debet; modi illam quærendi reliqui, propter defectum instrumentorum, quæ ad tantas dimensiones accuratiores esse deberent quam hominum fert industria atque cura, sunt suspecti. *

* Confer Celeberrimi Viri IO. BERNHARDI WIDEBVRGII *Diff. de Pondere Planetarum ad Solem tendentium. Proleg. §. 3.* DVHAMELII *Astronomiam Physicam l. II. cap. 3. pag. 111.* & Viri Clarissimi CHRIST-

FRIEDI KIRCHII *Memorabilia cæli Phenomena, quæ anno 1726. instante accident, Germanica lingua scripta.*

§. XXVI.

Quod vero firmamentum non inclinaverit imbecilliusque sit redditum, ita probamus, ut, cum experientia constet, leges æternas & immutabiles esse, quas natura in rerum creaturarum, quæ circa nos, adfectionibus, motibus, ponderibus stabilivit, inde concludamus, ad cetera quoque corpora, in ætheris immenso oceano, illas pertinere. * Videmus omnia gravia commune aliquod punctum appetere; omnia homogenea sua gravitate niti versus centrum suorum principiorum; quamvis quodlibet etiam corpus ad motum rectilineum pronum sit, & vi quadam ab eo retinendum, ut motu circulari vehatur. ** Inde concludimus, corpora etiam cœlestia ad motum rectilineum inclinare quidem; sed simul tamen ad commune aliquod punctum tendere. Cum enim in terra nostra particulas multas igneas, particulis æthereis a Sole ad nos transmissis homogeneas, inveniamus; reliquos quoque Planetas eas habere, eosque non minus ac terram nostram, versus Solem, ut centrum suorum principiorum, niti ratiocinamur. *** Immo hinc sequi putamus, Planetas quoque omnes tam ad motum rectilineum, per vim centrifugam, pronos esse, quam, per vim centripetam, in motu circulari retineri; quem circularem eorum cursum, simplex Planetarum motus inspectio comprobatur.

* Leges istas hocce paragrapho ratione directionis, sequente autem ratione virium consideramus.

** Hi duo motus se invicem non tollunt; sed alter alterum moderatur. Vide *Diff. WIDEBVRGII citatam*, item physicæ doctores recentiores: *NEWTONVM, VERDRIESIVM* alios.

*** Vbi eadem causse, ibi iidem effectus. Sed tamen probabilitate tantum ad ea adferenda nos duci, non est quod dissimulemus. Quis unquam in Planetis experimenta instituit? quæ autem de influxu eorum dicuntur, multo gaudent fundamento. Vide quos citavi & quæ dixi in *Diff. de Superstitione Hier. Cardani in rebus naturalibus. §. 12. seq.*

§. XXVII.

Porro motus leges generales, ex quibus motus leges speciales aut a priori erui, aut a posteriori in eas reduci possunt, a corporibus quæ circa nos sunt nunquam non eadem observantur. Nempe: effa-

effectus plenus semper est æquipollens viribus causæ integræ, hoc est viribus causæ ad effectum præstandum adhibitis; * & sequitur hinc lex motus altera: persistit in universo eadem virium quantitas. Inde iterum jure concludi potest, omnia corpora cœlestia totalia, cum effectum plenum semper præsent, quem ea antiquissimis temporibus præstitisse constat, ** vires etiam eorum plenas adhuc esse debere, & eandem adhuc in universo virium eorum persistere quantitatem; & vice versa, cum vires adhuc integræ sint, effectum semper, quia nihil eum impedit, persistere eundem. ***

* Primam hanc legem Leibnitiussuæ Dynamicæ fundamentum esse voluit. Vide *Acta Eruditorum Anni 1694, pag. 110. 1695. pag. 145. 1698. p. 327.*

** Effectum Planetarum aliam hic non intelligimus, quam quod ita ut ante celeritatem directionemque sui cursûs observent. Videantur quæ ad §. 21. ex Cicerope adduxi.

*** Sequitur hoc ex §. antecedente & confirmatur §. 29.

§. XXVIII.

Secundum hæc regulas constat, in agentibus necessariis, adeoque naturalibus, quæ talibus, præcaveri ab initio defectus posse, salutem divinam operante sapientia & potentia. Et cum majoris sapientiæ opus sit, obtinere effectus eosdem, perseverantiam nempe ordinis in natura, per media inter se connexa, quam per miracula superaccedentia; ab ente sapientissimo etiam media inter se connexa, eaque semper æqualia, ad conservationem rerum naturalium adhibita esse, inde necessario sequitur. Merito igitur systema mundanum machinam æternam dicimus mobilem, donec motus ejus a creatore per miraculum suspendatur, aut totum hoc opificiû in primum chaos redigatur. *

* Conferatur IO. KEPPLERI *Diff. Cosmographica continens mysterium Cosmographicum de admirabili proportionem corporum cœlestium*, & Vener. IO. GEORGII LIEBKNECHTII *Diff. Cosmog. de Harmonia corporum mundi totalium, narratione in numeris perfectis generatim desinita.*

§. XXIX.

Cum spatii angustia non permittat hæc ulterius explicare; nihil de nostra, Jovis quatuor & Saturni quinque Lunis dico, quæ & circa Planetam suum, & cum eo simul circa commune centrum, Solem, vehuntur. Nec nisi brevissimis moneo, motus corporum

cœlestium coactos haud esse, aut agitationem quandam violentam, ut inde corpora cœlestia terantur, minora pejoraque reddantur; sed facillime sine ulla vi Deum in creatione statim impetum hîsce machinis dedisse, qui per circulum, æternitatis symbolum, continuet. Nec est quod timeamus, ne materia ætherea ob gravitatem, quam ei quotidie accrescere putant, motui corporum resistat; cum mare hujus materiæ majus sit, quam ut aliis rebus compleri & condensari possit, immo nullo etiam modo probari possit, quod ætheri alia quam ante mixta sint, ejusque massam immutaverint. Vt igitur cœlum ruat, nosque obruat, non est ut timeamus. Nec proinde etiam est, ut quis, ob mundi decrepitam ætatem, tempus malum esse dicat. *

* Vide *Dissert. Wideburgii citatam, & Bülsfingeri Dilucidationes Philosophicas l.c.* ex quibus, quid etiam de Cometarum cursu statuendum sit, de quo Newtonum supra ad §. 22. audivimus, judicari poterit.

§. XXX.

Jam magni hic ponderis esse cupit argumentum de ætatis nostræ parvo spatio, cum Patres, maxime antediluviani, diutissime vixerint. Empedocles apud Plutarchum existimasse dicitur, Solem initio dies longe prolixiores effecisse. * Minus vero, argumentum, quo hoc probare conatur, rationi est consentaneum, cum vertiginosi motus non invalescere sensim soleant, ut ille putat; sed potius elanguescere. Nec est quod quis existimet, Solem initio dies effecisse breviores, sicque Patriarchas plures dies plures annos vixisse. Ex præcedentibus inanitas hujus opinionis constat. Dies igitur ac anni cum ejusdem maneant magnitudinis, in horum differentia naturali nullum hypothesi invenitur fundamentum. **

* Videatur Barrow loc. cit.

** Videatur qui subtilissime & plerumque accurate de tempore commentatur ISAACVS BARROW. l.c. Nec sine insigni utilitate hic legi possunt ERHARDI WEIGELII, *Phys. Panfoph.* pag. 99. & JO. MELCHIORIS VERDRIESII *Conspectus Philosophiæ Nat. Parte Gen. cap. III. §. 8. seq.*

§. XXXI.

Cum Sol eundem semper continuaverit cursum, hincque tempus per se nunquam non idem sit, circumspiciendum nobis est, utrum

utrum Patriarcharum longæva vita ubique sibi conslet, an vero in dubium vacanda sit. Gentilium quidem modum tempus dimetendi, in eo aberrare constat, quod annos minoris quantitatis computaverint; * sed de Patribus quorum vitæ durationem sacræ paginæ indicant, non simili modo nos expedimus. Lubentes concedimus, veros annos, cum de Patrum vita agatur, intelligi; nec inde tamen, tempus nostrum antiquiori pejus esse, bene concluditur.

* Vide AEGIDII STRAVCHII *Breviarium Chronologicum* l. IV. cap. I. quest. 5. & CHRIST. WOLFII *Elementa Chronologiæ*. Hic cum multa de cyclis, epochis aliisque huc spectantibus agat; de variis quoque anni apud varias gentes constitutionibus tractans, inter alia monstrat, Aegyptios primo habuisse annos menstruos, deinde trimestres, porro annum duodecemestrem 360. diertum fecisse, denique quinque dies epagomenas in fine addidisse, & cum sub Romanorum redigerentur dominium, annum Julianum aliqua tamen cum differentia, recepisse. Ille notat ex Plutarchi & Censorini propriis confessionibus patere, gentilium *χρονολογία* de annis minoris quantitatis intelligendam esse. PLINIVS *Historia Naturalis* l. VII. cap. 48. Ephorus, inquit, Arcadium reges CCC. annis. Alexander Cornelius, Dandonem quendam, in Illyrico D vixisse [tradit]. Xenophon in Periplo, maritimorum regem DC. atque, ut parce mentitus, filium ejus DCCC. quæ omnia inscitia temporum acciderunt. Annum enim alii astate unum determinabant & alterum hyema: alii quadripartitis temporibus, sicut Arcades quorum anni trimestres fuere: quidam Luna senio, ut Aegyptii: itaque apud eos aliqui & singula millia annorum vixisse produnt. Sed ut ad confessæ transcamus, Argantbonium Gaditanum LXXX. annis regnasse prope certum est: putant quadragesimo cepisse. Masinissam LX. annis regnasse indubitatum est. Confer. SAM. REYHERI *Ma-thesein Mosaicam* titulo IV.

§. XXXII.

Nostris etiam adhuc temporibus non desunt, qui vitæ longissimum attingant spatium, * non tempori igitur; sed hominum intemperiei imputandum puto, quod plerumque terminum jam vitæ, septuaginta aut octoginta annorum senes inveniat. ** Sed longævi non statim per brevius tempus viventibus feliciores sunt habendi, cum ipsa senectus morbus sit, perpetuusque mortis timor longius illos graviusque angat quam hocce. Vix quoque ac ne vix quidem inducor ut credam, optare tantum sibi tam profectam

etatem posse, qui suis strenue satisfaciat partibus; qui autem iis non satisfacit, conscientiae ipsius intranquillitas ita eum cruciabit, ut nihil aliud felicem illum reddere queat. Tranquille autem qui, quæ ejus sunt agens, etatem transigit, non minus si annorum brevi numero, quam si amplissimo usus, a statione avocetur, felicem se reputabit ipsum, reputabiturque a sapientiore quolibet. Tempus igitur, ex hac etiam parte, ab omni accusatione est liberandum. ***

* Fr. Gvaldus Venetus annos 400. vivendo supergressus est, ut peculiaris libellus de vita & medicina ejus testatur; & S. Severinus, qui anno ætatis 197. Episcopus Tongrensis constitutus est, 375um annum agens mortuus est, ut PETRVS DE NATALIBVS in *Catalogo Sanctorum & eorum gestorum* refert.

** Jam Moyses tempore, hæc senum ætate professorum ætas erat PL XC, 10.

*** Vide SENECAE *librum de brevitate vite*.

§. XXXIII.

Succedat querulantium turba alia, & corporum humanorum accuset decremента, imbecillitatem, parvitatem. Dicunt exemplum Ogi, filiorum Enaki & Goliathi, magnitudinem corporum nostrorum imminutam satis prodere, * Herculem aliosque, robustiores tum fuisse homines evincere. De Hercule similibusque non est quod dissimulem, strenuos hos mihi videri heroës, quorum res gestæ, ne fastidium similibus semper circumstantiarum, duellorum, pugnarum narratio crearet, sic descriptæ sint, ut nescio quibus fabulis, de congressibus cum draconibus, monstris, similibusque exornarentur, & e longinquo tantum describerentur. ** Non autem nisi plane ignarus eorum quibus nos gaudemus is est, qui hisce nostra tempora carere bonis sibi persuadet; cum nullam sit regnum, nulla provincia, quæ non suis superbiat heroibus, strenuis fortibusque militibus.

* PLINIVS H. N. l. VII, cap. 16.

** Vide ADAMI EBERTI *Relationes ex Parnasso*; conferantur etiam EDVARDI STILLINGFLEETII *Origines Sacre. l. III, cap. 5.*

§. XXXIV.

Ad staturam quod attinet, reputet qui ad turbam istam querulantium spectat, cum tot seculorum experientia constet, eandem

dem semper ultimis temporibus staturam servatam esse, cur decre-
menta hæc hodie cessent, si olim a Natura sua recesserint homi-
nes? Jam Davidis tempore Goliathi statura, sex cubitorum & spi-
thamæ, pro gigantea habita fuit, * nec ea tamen hodie staturæ
nostræ adeo magnus excessus est. Nam qui Potentissimo Clemen-
tissimoque Prussorum Monarchæ sunt milites, staturæ omnino ma-
gnæ homines adhuc dari satis probant. Patajones autem, confi-
nia freti Majellanici incolentes, non minus ac Enagii filii, statura
sua procera admirantes reddunt qui eos inspiciunt. **

* 1. Sam. XVII, 4. שש אמה ומה, hic אמה Cubitus fuit 6. pal-
morum, vide HADRIANI RELANDI, *Antiquitates Sacras Parte I, cap.*
3. §. 13. ומה Spithama, fuit trium palmorum sive duodecim digitorum, ut
notat Kinchi in libro *Radicum*. De Goliathi autem statura MATTHÆVS
HOSTVS ut conferatur omnino meretur, qui in *Historia Monomachia Da-*
vidis & Goliathi cap. 4. Quod hic dicitur, inquit, Goliath fuisse sex cu-
bitorum cum cubiti semisse, vel cum pedis dodrante, intelligendi sunt cu-
biti Hebraici: qui, si non majores cubitis Græcis fuerunt, non certe mi-
nores, sed pares eos fuisse, docti viri arbitrantur. Hi sex cubiti cum do-
drante pedis Græci, faciunt pedes novem cum dodrante, ulnas hic Franco-
fordiæ ad Odeam sistratas quatuor cum semisse, Lipficæ vero ulnas faci-
ant quinque cum triente.

** Vide de hisce FRESJE *Voyage de Perou.* & HIER. MAGIVM *de*
Gigantibus.

§. XXXV.

Quæ autem de cadaveribus narrantur, triginta, immo centum
pluriumque cubitorum longitudinis, merito, hominum hæc cadavera
esse dubitatur. Statura enim tam enormis hominis corpori plane non
convenit; nec alia desunt ad quæ artus illi inventi referri possint. *
Totum autem & integrum cadaver si inventum naretur, vix fidem
narrationem eam mereri credo. Immo si de gigantibus tam enormis
magnitudinis apud veteres sit mentio, tropice fortassis ea sunt intel-
ligenda. Et cum aut suspectæ fidei sint, quæ dicuntur de corporibus
magnitudinis tam enormis; aut si ea non adeo enormis fertur, nec
jam istiusmodi desunt homines; nec ex hoc capite litem tempori mo-
vendam puto. **

* ATHAN. KIRCHERVS *Mus. S. I. VIII. Sec. II, cap. 4.* cum de termi-
no magnitudinis & virium in animalibus agit: *Discimus hoc, inquit, ex mar-*
moreis Colossis Romæ quorum extiticia membra sine sulcro addito

confilere non possunt, quin pondere tandem divellantur. Quod si verum est in marmoreis statuis, quanto magis in humana statura prodigiose magnitudinis verificabitur. Ad quæ alia, præter humana corpora, artus istiusmodi referri possunt, de eo vide *Extrait d'une Lettre écrite de Zürich à Mr. l'Abbé Bignon par Mr. Scheuchzer, au sujet des restes d'un homme noyé dans le Déluge universel*, quæ legi possunt in *Ephemeridibus*, quibus titulus est : *Journal des Savans*. 1727. *Januar. num. 3.*

** Confer Celeb. JO. CHRIST. BECMANNI *Historiam Orbis terrarum Geogr. & Civ. Parte I. cap. IX. Sect. II. §. 13.*

§. XXXVI.

Nunc quoque de tempore querulantes audiamus, qui ea quæ actiones hominum, morales præcipue concernunt, temporì ipsi immerito tribuunt. * Accusant tempora nostra : nunquam tantam in rebus sacris negligentiam præcis temporibus obtinuisse, quanta ubique fere nunc obtineat. Alii tantam in plurimis locis superstitionem esse clamant, quanta antiquitus inaudita fuerit.

* Vide §. 4.

§. XXXVII.

Sed nullum, prohi dolor! seculum, nullum tempus, ab hisce vitis fuit immune. Quod in primitiva Christi ecclesia circumcisi sint profelyti, gentiles etiam, ut alia vitia, ita & superstitionem arguit. Quod viduis gentilibus necessaria non sint subministrata, negligentiam satis indicat. Magna quoque inter Judæos animi levitas, in rerum sacrarum administratione, obtinuit crebrins, quod inter alia Aaronis filii Nadabab atque Abihu, scelerati filii Eli & lugens Propheta testantur. * Pascha per longum temporis spatium non celebratum; templum, collata quamvis ad hoc pecunia, non reparatum; lex plane perditâ, & Josia rege demum rursus inventa, varique reformationes, ecclesiam & tum temporis non raro corruptam fuisse comprobant. ** Quanta Judæorum, gentes imitantium, fuerit superstitio, non credo quod opus sit ut indicem. Immo si alterum statim, primorum Adami filiorum, fratricidam fuisse reputes, de puritate ac innocentia priorum temporum, alia judicabis omnia.

* *Jerem. XI, 10.*

** Vide FRID. SPANHEMII F. *Brevem Introductionem ad Historiam Ver. Test. & Vener. JO. FRANC. BVDDEI Historiam Ecclesiasticam V. T.* adhuc autem in aliis multis Ecclesiæ Judææ corruptionem brevissimis nota-

vit Vener. ADAMVS RECHENBERGIVS *Summarii Hist. Eccles. P. I.*
§. 14.

§. XXXVIII.

Nec statum ecclesie hodiernæ reddit miserum, quod Deus se non amplius per Prophetas, miracula similibusque modis manifestat. Hoc enim ipsum est, quod feliciores longe nos reddit, quam veteris ecclesie homines; omnibus jam, quæ ad salutem creditu factuque necessaria sunt, manifestatis, ut ita extraordinariis revelationibus divinis non amplius indigeamus. Quæ in antiquissima ecclesia sæpe tantum adumbrabantur, ea jam ipsa accepimus. *

* Vide Vener. BYDDEI *Dissert. de Prærogativis fidelium N. V. præ fidelibus V. T. in syntagm. dissertationum ejus theologicarum.*

§. XXXIX.

Nec est quod quis optet, ut eo tempore vixisset quo Christus in terra versatus est. Cogitet, quot fuerint per miserum ipsius statum eternum offensi. * Qui hereticos nostri temporis cogitat, ne illud propterea infelix, prioribusque pejus putes. Percurrit sæcula, etiam priora omnia, nunquam defuerunt qui turbarent ecclesiam, suisque exemplis atque doctrinis, quæ mendacii a veritate, quæ vitii a virtute sit differentia, demonstrarunt. Deus semper conservat suos, quilibet, ut inter illos numeretur, habet quod curet.

* Videatur THOMAE BROWNE *Religio Medici. P. I. Sect. VIII. p. 46.*

§. XL.

An rerum publicarum status jam demum ita est corruptus, ut pecunia multi honores, munera, patrocinia parent? Cicero quidem: Male res habet, inquit, cum, quod virtute effici debet, id tentatur pecunia; * invictos tamen ferro Romanos, a Jugurtha aliquoties auro devictos scimus. ** Inmo cum divitiis magis atque sumptibus, quam probitate & industria, cum majoribus suis contendere inciperent; *** moribus eorum recipiebatur, non nisi eum equitem habere, cui ingenuo ipsi, patri avoque paterno, CCC HS census esset. * Qui etiam jacturam pecuniæ fecerat, de dignitate & ordine deturbabatur. **

* *de Officiis lib. II, cap. 6.*

** SALVSTIVS *de Bello Jugurthino edition. Janssoniana de 1647, pag. 55. 60. 61. 75. 77.*

*** *ibid. pag. 49. & SVETONIUS in Julio Cesare edit. Mairti de 1645. p. 14.*

* PLINIVS *Hist. Nat. l. XXXIII, cap. 2.* & PLINIVS junior *l. l. Epist.* 19. item SVETONIVS in *Jul. Caf. pag. 26.* & OVIDIVS 3. *Amor. 7.*

** Videantur IO. ROSINI *Antiquitates Romanae l. II. c. 17.* Si etiam §. 20. dicta perpenderit, sepius e re societatis esse videbis, ut locupletum peculiaris habeatur ratio, hique aliis non nunquam praeferantur.

§. XLI.

Etiamsi omnes homines natura libertati studeant, * respublicae tamen Graecorum, quae maximam sibi conciliarunt laudem, * impedire non potuerunt, quo minus tyranni inter ipsos exorirentur. *** Dissidia, seditiones, perfidiam, simulationes, invidiam, varias gravesque mutationes, in optimis quoque exortas esse rebuspublicis, historicorum volumina loquuntur. * Immo respublica ab omnibus immunis imperfectionibus, nisi in optantium atque sperantium cerebro, locum non invenit. **

* JULIVS CAESAR, de *Bello Gallico l. III, cap. 10.*

** CICERO, pro *Flacco cap. 26.* LIVIVS *l. III. cap. 31.* PLINIVS *l. VIII, Epist. 24.*

*** CORNELIVS NEPOS in *Alcibiade cap. 10. in Pelopida cap. 5. in Trasibulo cap. 1.*

* TACITVS, *Annalium l. III, cap. 27.* De bello Catilinario aliisque in Romana republica turbis, consule Livium, Florum & alios.

** Finxit perfectam, ut sibi promittit, rempublicam PLATO, ut praeter ea quae *Dialogis X. de republica vel de Justo* continentur, brevissimis exponit in *Dial. V. de legibus*, edit, *Basileensis de 1534, pag. 511. in fine.* THOMAS MORVS in fine *Utopiae* suae fatetur, multa esse in Utopia, quae in nostris rebuspublicis desiderentur; sed ad quae impetranda, exceptis suspiriis, nulla datur media.

§. XLII.

An nondum conquerentium finis est? Nondum. Hippocrates, Celsus, Galenus ubinam sunt? Ita vulgo creditur, Medicos veteres, iis qui nobis sint, longe praefereandos esse. Sed, quibus nos gaudemus, ex antiquis non optima solum conquirunt, verum & recentius inventa, emendata, aucta varietate mutata inspicunt, hincque medicinam perficiorem reddunt. Quantum per Anatomiam tantum scientiae huic factum sit incrementum, ignarissimos solum later. Quod vero inter bonos multos, multi etiam dentur qui spartam suam, ut debeant, non exornant, de eo, non minus ac nos, veteres conqueruntur. *

* PLIN.

* PLIN. *Hist. Nat. l. XXIX, cap. I.* In hac, inquit, artium sola evenit, ut unicuique medicum se professo, statim credatur, cum sit periculum in nullo mendacio majus. De incrementis studii medici consule Clerici atque Barbesii *Historiam Medic.*

§. XLIII.

In rebus Philosophicis, non est quod veteribus palmam præ recentioribus concedamus. Nullus quidem nego, veteres in multis magni faciendos esse; sed & recentiores ea, quam merentur, laude privandi non sunt. Habuerunt & antiqua jam tempora suum Socratem, Platonem, Aristotelem totque alios Philosophos acutissimos, suum quoque Potamonem, qui ex sectis Philosophorum reliquorum, optima quæque eligebat. Ut vero minora sunt rerum plurimarum initia; ita qui jam, non ex Platone solum & Aristotele sua colligunt, verum & ex iis, qui diu veteribus insudantes nova quoque accenderunt lumina, antiquioribus hi sine dubio sunt præferendi. Præcipue qui rebus ipsis invigilant easque debite ponderant, omni honoris cultu sunt prosequendi.

* Vide DIOGENIS LAERTII, *lib. X. de vitis, dogmatibus & Apophthegmatibus clarorum Philosophorum.* THOMAE STANLEI, *Historiam Philosophia Orient. & Celeb. GOTTLIEBI STOLLII, Historiam Litterarum.* Bene PLINIVS: Sum ex iis, inquit, qui miror antiquos, non tamen ut quidam, temporum nostrorum ingenia despicio. Neque enim lassæ & esposita natura, ut nihil jam laudabile pariat, l. IV. *Epist. 21.* Confer etiam FR. BACONIS VERVLAMII *librum de augmentis scientiarum.*

§. XLIV.

Veterum Mathematicorum machinæ, specula cæcistica, alia, in hisce scientiis tempora antiquiora nostris esse præferenda, movent forsitan quosdam ut existiment. Satis vero multa quæ regeamus, se nobis offerunt. Cartesii calculus Geometricus, Leibnitii calculus infinitesimalis, aucta insigniter ars navigandi per pixidem nauticam, nova disciplina aérometrica atque acustica, horologia, telescopia, micrometra, reliqua, & in singulis disciplinis tot novæ accessiones, recentioribus quot quantaque debeamus, non possunt non clarissime indicare. *

* Vide PERRAVLTII *Parallele des Anciens & des Modernes Tom. IV.* Vide etiam Celeb. RVD. CHRISTIANI WAGNERI *Programma de Progressu parallelo Analysis & Præceos Mathematicæ. Helmstadii 1701.*

§. XLV.

Sed magia veterum sui jam non habet similem, ut exempla magorum Aegyptiorum, Persarum aliorumque docent! Verum enimvero si magia accipitur pro arte, ope spirituum malorum miranda efficiendi, utinam inter nos ea non inveniretur. * Si vero cognitio accuratior, in Mathematicis & Physicis ea præstandi, quæ aliis videntur miracula, intelligitur hac voce, nostra tempora antiquis quomodo curque cedent? Inspiciamus tantum, idque debita attentione, quæ habemus, longe magis miranda nos quam antiquiores efficere posse, convicemur. **†

* Vide Vener. JO. FRANC. BVDDEI *Theses de Atheismo & Superstitione cap. IX, §. 3.*

** Vide Ephemerides Societatis Regiæ Anglicanæ: *Philosophical-Transactions*; & Gallicanæ: *Histoire*, ut & *Memoires de l'Academie Royale des Sciences*; item Prussicæ: *Miscellanea Berolinensia*; *Acta Eruditorum Lipsiensia* & alia, in quibus passim, quantæ in scientia physica, cognatisque disciplinis, factæ fuerint accessiones, videre est.

§. XLVI.

Quid de aliis artibus dicam? Non parvus numerus rerum perditarum mihi objicitur: ars conficiendi purpuram, levem armaturam, instrumenta nonnulla musica. Nec hæc vero me movent ut credam, tempora nostra prioribus minus esse felicia. Typographiam & Chalcographiam omnibus illis opponam; præterea notitia plurium terræ partium, & quæ inde apportantur, tempus nostrum satis superque nobilitant. *

* Vide GVID. PANCIROLI *Res memorabiles seu perditas*, item GEORGIVM PASCHIVM *de Inventis nov - antiquis*.

§. XLVII.

Nunc adhuc litteratos video temporis accusare corruptionem, quia non omnes iis cumulantur honoribus, quibus se dignos esse firmiter credunt. Valde autem vereor, ut justitia hujus eorum querelæ probari possit. Dicunt: Xenophon, Aristoteles, Plato, Dio Cassius, Curtius, Seneca, alii, numinum reverentia a reliquis sunt culti. Non autem aliam ob causam eos ita honoratos credo, quam quia magnis præerant officiis, aut quia gratia illustrium virorum gaudebant. Veneratio illa proinde, dignitati eorum potius quam eruditioni tributa fuit.

fuit. Nec est quod credas, ab omnibus promiscue tam magni illos factos esse. Regeris: historicorum hoc referunt scripta.* Cogita, anne forsitan clientum erga patronos hæc sit adulatio, quæ historicos ad ea tradenda moverit. Quod autem tam multi, qui litteris dant operam, non incalescant, ex variis hoc contingit causis. Volunt quidam emicare, & non possunt; quidam possunt, non volunt; quidam nec volunt nec possunt, & tamen litterati aliqua sunt ratione.**

* Consule ADAMI EBERTI *librum citatum*.

** Vide JOANNEM PIERIVM VALERIANVM & CORNELIVM TOLLIVM *de Infelicitate Litteratorum*.

§. XLVIII.

Aureum denique seculum ut redeat desideratur. Non immerito quidem hoc fieri credo, dummodo præcesserit quæstio, an unquam fuerit. Gaudium multis oritur si reminiscuntur, nullas hominibus curas fuisse, perpetuum vernum tempus, nullum morbum, senectutem nullam, nullam nec hominum nec bestiarum feritatem, gaudia semper, tripudia atque convivia. Hæc autem ita fuisse unquam unde probabis? A poetis & alia multa conficta sunt, quæ ut credas non adduceres; aureum autem seculum, si ab iis quod fuerit traditur, an propterea statim credes? Fuerunt, qui tui similes, hæc sibi, quia ut essent optabant, sinxerunt; uti hodie adhuc Utopiam huiusmodi multi desiderant atque exoptant. Hoc tamen facile etiam concesserim, qui quietam vitam arctamque amicitiam coluerint, secure etiam jucundeque vixerint, aliis invidis ea intuentibus, occasionem dedisse, ut sibi imaginarentur, tam jucundum illis felixque esse tempus, quod aureum appellari mereatur.*

* Vide NATALIS COMITIS *Mythologiam cap. II, pag. 116. & 117.*

§. XLIX.

Verum autem aureum seculum illis est, qui, sua sorte contenti, officio suo satisfaciunt, tranquillaque fruuntur conscientia. Vti enim, qui non maiora semper appetit, sibi ipsi inolestus non est; simul & satisfaciens suo officio, eo ipso & aliis satisfaciendo, molestias ab iis non patitur; & tranquilla denique conscientia, revera tali, Deum quoque experitur propitium; ita quid tali desit nescio. An desunt amplius divitiæ? iis non indiget; an splendidis honori-

32. INJVSTA QVERELA EST TEMPVS ESSE MALVM

moribus variisque caret voluptatibus? nec fuisse eget qui veram appetit felicitatem. * Si enim necessaria tantum adsint, reliqua omnia facile superantur, ab expectatione certissima, possessionis vitæ interminabilis, ejusque totius simul ac perfectissimæ. **

* Vide ANDR. RVD/GERI *Anweisung zu der Zufriedenheit*:

** Vide A. MANLIVM TORQVATVM SEVERINVM BOETIVM *de Consolatione Philosophia*.

§. I.

Non est ergo quod tempus ipsum malum esse existimemus, non est quod tempora nostra infeliciora, quam priora fuerunt, æstimemus, & propterea conqueramus. Præsentia sunt ut fuerunt præterita; & aliqua, eorum quæ in tempore sunt, si sint immutata, vel plane etiam amissa, alia non leviora inventa sunt, & pleraque in melius mutata. * Contenti itaque simus nostris, ea contemplemur, eis gaudeamus, Deoque magis gratias pro iis agamus, quam ut aliis sua invideamus. Videamus præterea, ne cum nostro tempore viventes antiquis cedere credimus, ipsi eis maxime cedamus, & non tempori, sed nobismet ipsis, infortunii nostri causa sit imputanda. **

* Tempus est unum, ærum, bonum, & ratione essentis & ratione existentis: Si quæ mutata, si quæ mala, ea in tempore sunt, non ad tempus ipsum spectant.

** Constitueram contra IOANNIS CRAIGII *Theologiæ Christianæ principia Mathematica* quæ Londini 1699. prodierunt, aliqua addere, cum ille proportionibus probabilium ratione temporis, suspensionum incrementa ac decrementsa veritatum, aliarumque rerum, secundum durationis spatium tradat, sibi quæ ac aliis, ea methodo mathematica demonstrata esse, persuadere satagat; cum autem spatii angustia hoc nunc permittere recuse, in aliud tempus hæc sunt differenda.

COROLLARIA.

- I. Si similibus similia addantur similiter, tota sunt similia.
- II. Inter certitudinem & necessitatem magna est differentia.
- III. Præsens est gravidum futuri.
- IV. Contra veritatem nulla datur invincibilis objectio.
- V. Duo contraria sepe ambo sunt possibilia; sed propterea non statim ambo existunt.

S. D. G.

